

**Saturday, December 6, 2025**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**AMC**

AMC Board of Corporators meeting chu nimir khan neih a ni a, Sorkar kum kal mek 2025-26 a Revised Budget Estimate atan cheng vbch. 114.04 an pawm.

AMC Board of Corporators meeting hi Aizawl Mayor, Pu Lalrinenga Sailo kaihruaiin, Thuampui-a AMC Board of Corporators Meeting Hall-ah neih a ni. AMC Executive Corporator, Cash & Accounts changtu Pu Lalringliana'n Sorkar kum kal mek 2025-26 chhunga sum indaih lohna puhrukna tur Revised Budget Estimate cheng vbch. 114.04 a pharh a, hei hi an sawi ho hnuah lungual takin an pawm a ni.

AMC Revised Budget Estimate hi Budget Estimate awmsa atanga a punna chu cheng nuai 186.97 a ni a, AMC budget pumpui atanga cheng vbch. 91.52 (80.25%) chu mipui hmasawna kaihhnawih thawhna atan hman tur a ni a, Corporator leh thawktute hlauh atan cheng vbch. 15.73 (13.79) dah niin, Local Council lawmman leh a kaihhnawihah cheng nuai 122 ruahman a ni bawk.

Sorkar kum kal meka AMC sum thawhchhuah chu cheng vbch. 7.5 a tling tawh a ni.



**CHHAMB BATTLE HONOUR CELEBRATION DAY**

Kum 1971-a India leh Pakistan indona a 5th Assam Regiment ten Chhamb indona avanga chawimawina Battle Honor an dawn champha vawi 54-na chu nimir khan Ex-Fighting Fifth Association (EFFA) ten KV Paradise Durtlangah ah an hmang.

He hunah hian indonaa tel 5th Assam Regiment a Mizo sipaite leh an chhungte an tel a, Lt. Col. Clement Lalhmingthanga, MLA leh Mizoram Ex-Service League President ni bawk chuan khuallian niin a hmanpui a ni.

Pu Clement Lalhmingthanga chuan 5th Assam Regiment in kum 1971 a Pakistan nena indona hnehna ropui tak lawmna hun kumtin hman a ni thin chu lawmawm a tih thu sawiin, 5th Assam Regiment ten he indonna vanga chhamb battle honor hlan an ni chu chuanawm a tih thu a sawi a ni.



**RED KETTLE SERVICE**

Salvation Army te chuan Kum tin Krismas dawn apianga an tih thin angin mi harsate tanpui nan Red Kettle service an kalpui tan.

The Salvation Army ten khawvel puma kum 134 lai an kalpui tawh, Krismas dawn apianga mi harsa tanpui ngaite tana bawm (Ketli Sen) dawha khawlaia rimawi an tum thin, Red Kettle service chu Mizoramah pawh kalpui kalpui thin niin, Kumin 2025 atana Red Kettle chu nizan khan India Eastern Territory-a Territorial Commander, Col. Lalbulliana chuan Woodland Hills, Aizawl ah a hawng a, vawiin atang khan Mizoram hmun hrang hrangah he service hi kalpui nghal a ni.

Kumin hian Aizawla Corps Band hrang hrang 27 te chuan Aizawl DC remtihnaing veng hrang hrangah inrinni apiangin Red Kettle hi an kalpui dawn a, December ni 20 ah a khaikhawmna a awm ang a, sum lut zawng zawngte chu veng hrang hrangah, khawtlang hruaitu YMA/LC-te rawn chungin a mamawhtute hnenah an sem chhuak vek dawn a ni.

Salvation Army te hian nikum Red Kettle service ah khan Rs. 4,15,255 an hmu chhuak a, kumin hian mipuite khawngaihna azarah nikum aia tam hmuh chhuah leh ngei an tum a ni.



## **MHIP PRESIDENT**

MHIP President Pi Lalliani chuan Mizo Hmeichhiate himna leh hmasawmna ngaihtuah a, theih tawp chhuah zel a tul thu Sazep MHIP Golden Jubilee a hmanpuinaah a sawi.

Nimin khan Tuipuiral huam chhunga Sazep khua MHIP te chuan an din champhaphak vawi 50-na (Golden Jubilee) Sazep Community Hall-ah lawmin MHIP General Headquarters atangin President Pi Lalliani chuan khuallian niin a hmanpui a. Mizo hmeichhe himna leh hmasawmna ngaihtuah a tul thu a sawi bakah inlunguala theihtawp chhuah a tul thu a sawi.

MHIP President Pi Lalliani chuan Mizo Hmeichhiate hmasawm chho zel chu Kristianna vang anih thu sawiin Mizo hmeichhe chhuanawm tak awm chho zel chu lawmawm a tih thu a sawi a. Hetih rual hian hmeichhe himna leh hmasawmna dal thei thil chi hrang hrang tarlangin chung harsatna sukhang tur chuan Mizo mipuite insiam that a pawimawh tih sawiin hemi kawngah hian tan lak thar a pawimawh a ti baw

MHIP President chuan hur suauna avanga naupang kum tling lo khaikhem pung chho zel leh, Mizo mipate ruitheihthil avanga naupangte tea hmeithai tam chho zelte chu a hnam anga thil pawh tak, hnam hnuk khawih a nih thu tarlangin, ruih hlo anga ngaih chiah loh Gutkha hmanga thil siam chhuahin thalai leh naupang hriselna a tihchhiat dan chu lungchhiat thlak a tih thu sawiin MHIP chuan hnam tham leh incheina humhalh leh vawn nun ringawt duh tawh lova. A mihring himna leh hriselna lama hmasawmna bakah mihring dinchhuah kawngahte phak ang tawka hma lak chhoh zel a tul thu a sawi baw a ni.

Golden Jubilee lawmna pual hian, infiamna leh inrihlimna chi hrang hrang buatsaih a ni a. Jubilee lung tha tak phun niin tlaiah Jubilee ruaitheh a ni baw.

